



“Tu no tu esistis, no tu puedis existi!”

Cussì al berlà Toni al mostri che al veve denant. Al jere vignût fûr dal cimiteri ta chê sere novembrine; propit un zombie ma i zombies no esistin, no puedin existi. Il muart al è muart, e vonde! Nol po cjaminâ. E pûr chel al cjaminave e i stave rivant dongje, scloteant. La musate blu, di fâ pôre; un vistît di chei che a dopravin di fieste i vielis di paîs, dut mangjât dai viers. Al sameave reâl. Un vêr zombie; a Toni no i pareve che al fos un om travistût. Al rugnave e al rivave simpri plui dongje, simpri plui dongje, simpri plui dongje cuant che... a doi pas di Toni che al jere fer, cantesemât, paralizât dal terôr... al sparì, a colp!

“Nol podeve existi...” al pensà Toni. “Miôr lassâ pierdi chei fonghets che mê cusine mi à quartât di Camden Town... mi fasin viodi masse brutis robis...”

E cussì il nestri zovenat al le vie dal cimiteri ma... cun pas malfer e... al scomençà a scloteâ e intant si sintive strani... si cjalà lis mans... a jerin diventadis cianotichis!

“Rrrrrrrrrrrrrruhhh” al rugnà Toni.

**di Checo Tam**